

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Illorsuarmit nuutsitaasimanerinit pissutsit pillugit, najugaqartuusimasut pineqartut inatsisitigut isumannaatsumik pineqarsimanerisa qulakkeerneqarnissaa siunertaralugu, arlaannaanulluunniit attuumassuteqanngitsumik misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuititsineq 2027-mi upernaakkut tamanut ammasumik saqqummiunneqareersimassaaq.
(Inatsisartunut ilaasortaq Aki-Matilda Høegh-Dam, Naleraq)

Tunngavilersuut:

Qanorluunniit oqaraluaanni, Illorsuarmit nuutsitaanikuupput. Tamanna piviusuuvoq.

Maannakkulli tamanna pillugu oqartussatsinniit soorlulusooq aap naamillu ataatsikkut oqaatigineqartut.

Aanngooq, tunngaviusumik inatsit naapertorlugu inuit Illorsuarnut nuussinnaappunngooq. Kisiannigooq Illorsuarnut nuuttoqassaguni pisorta qarfinnit nalinnaasumik sullinneqavittoqarsinnaanngilaq. Pisorta qarfinnut sulisoqassappanngooq sulisut ulorianartorsiortinneqassammata¹ sulisoqarsinnaanngilaq, naak Illorsuarni najugaqarsinnaatitaagaluartut.

Taamaasilluni atuarfiit allallu pisortanit ingerlanneqartussat ingerlanneqarsinnaatitaanngitsutut taakkartorneqarput. Taamaasilluni meerataqaraanni, meerarlu meeqqat atuarfianni atuartussaataalluni atuarfissaqanngikkuni, angajoqqaat meeqqaminnik paarsinerlussimasutut nalilerneqarsinnaallutik arsaarneqaratarsinnaapput.

Nunagisaminnut angerlarsimaffimminnullu najugaqarniarneq patsisigiinnarlugu. Apeqquusernartoqarpoq. Iternge tikillugu arlaannaanulluunniit attuumassuteqanngitsumik qulaajaasoqartariaqarpoq. Aamma ilumut Illorsuarni najugaqarsinnaanissamut isumannaallisaanissamut pisinnaatitaaffinnik qulakkiigassaartoqarsimanersoq misissorneqartariaqarpoq.

¹ § 37 apeqqummut akissuteqaat nr. 2025-110

Aalajangiiffissatut siunnersuutip akuerineqarnerani arlaannaanulluunniit attuumassuteqanngitsumik misissuisoqarnissaannut Naalakkersuisut peqquneqassapput. Arlaannaanulluunniit attuumassuteqannginnissaa pingaaruteqaqqissaarpoq, pissutigalugu pisortaqarfiit maanna inissisimanermut aalajangiisuusimasut imminnut misissortussaanginnamik.

Nunaqarfiit illoqarfiillu matuneri inuerusarnerilu nunatsinni ajuisortutut isigisaraagut. Tarnikkut ikilernerqartarpugut. Taamaammat pisimasut misissuisoqarnissaannik qulakkeerinnittariaqartugut isumaqarpunga, ilumut Illorsuarmiuusimasut innuttaasuisa pinsinnaatitaaffii malinneqavissimanersut paasissallugu pingaaruteqavissorpoq.

Pisortanut aningaasatigut allaffissornikkullu kingunerisassat

Qaammatinut 12-nnut naatsorlugu 3 mio. kr.-imut misissuinerup aningaasartuuteqarnissaa naatsorsuutigineqassaaq. Tamanna siunnersuutaasimasumut assingusumut (UPA2023/58) sanilliunneqarsinnaavoq, ilaatigut imatut allassimasoqartoq:

“Aqutsisumik atorfinitsitsinissamut kiisalu ikiortissat amerlassusaat, allagaatinik misissuinissamut atatillugu angalanerit aamma ikiortissanut aningaasartuutissat ataatsimut ima naleqassangatinneqarput: Katillugit: 4,5 mio. DKK qaammatinut 18-nut, 6 mio. DKK qaammatit 24-nut”

Namminersorluni inuussutissarsiuteqarnermut aningaasatigut allaffissornikkullu kingunerisassat.

Soqanngilaq.

Innuttaasunut aningaasatigut allaffissornikkullu kingunerisassat.

Allaffissornikkut annertunerusumik kingunerisassaqaanngitsutut naatsorsuutigineqarsinnaasumik Illorsuarmiuusimasunut peqataatinneqaratarsinnaanissaaq naatsorsuutigineqarsinnaassaaq.